



Di gnot mi sameave come di jessi spiât. O crodevi di no jessi mai bessôl cuant che o durmivi tal jet. No je une novitât: tropis voltis us ajo fevelât dai miei vencui?

Vê in cjamare dai manifescj cui quadris di Hieronymus Bosch nol jude, specialmentri cuant che o cjali “Ascesa all’empireo”, cun dutis chês animis pierdudis intes tenebris che però a van viers une sfere di lûs. Al samee che che il pitôr al ves vût une esperience in pont di muart, o forsi i vevin contât alc, cui sa?

Bon. No varès di cjâlâ chel quadri e nancje chel di chei diaulons che a mangjin i danâts come che ju an piturâts i fradis di Limburg (pitôrs de Belgjiche).

Alore ta chê sere mi indurmidîs. Dut regolâr. Però, come che mi capite di spes, mi svei vie pe gnot. Par un moment no rivi nancje a capî dulà che o soi. Dulà isal il mûr? Dulà il cric de lûs? Sojo par da pîts?

Dopo un pôc o tocji il mûr e o cjati il cric. Piade la lûs mi alci in sinton. O voi li dal barcon. Lu vierç. Meracul! Une gnot bielissime e plene di stelis. Nie umiditât. Clime fantastic. Fresc. Aiarin. Il viers di une çuvite. Mi ven voie di lâ fûr.

Cualchi ore prime, di sere, a jerin dai nûi a orient e daûr a jerin platâts i lamps. L’aiar al devi di vê partât lontan il temporâl.

Bon. O voi fûr. O cjapi su la biciclete e mi met a cori pes stradelis di campagne. Al è bielissim.

O rivi intun grant prât dulà che a cjantin milante e milante grîs. O cjali lis stelis parsore di me.

O soi propit pierdût ta chei cjamps di stelis sot dal voli dal Sgripion.

Mi rint cont di trop ben che o stoi. Ce biel che al è vivi, cialâ il cîl, sintî i gris cjantâ e respirâ chist bon aiar fresc.

A un trat mi ‘nacuarç di une lûs avonde basse: mi samee che mi vegni daûr. Trop ise lontane? No si capîs ben... e je une lûs mate che e cambie colôr, che e samee saltâ di ca e di là tra lis ramascjis di pôi... ve che o rivi a stimâ la distance: sui dusinte o tresinte metris.

O cîr di lâi daûr. O passi par un troi strent cu la bici e o rivi intune boschete di acaciis e pôi. E je a pocje distance di me cumò: alte un vincj metris... grande un metri par un metri... o plui? Zale... no, e cambie, ancjemò... rosse, narançon cumò cumò... al è dut un lampâ... mi ven incuintri...

Mi samee di jessi dentri... di...

**di Checo Tam**

**#189**

*Note di Checo: (ispirade a une conte vere ... la venture di viodi une lûs balarine e je capitade a un gno amî cjargnel... ma in tancj lis an viodudis... i fûcs di Sant Elm che a viodevin balinâ i marinârs durant dai burlaçs parsore dai arbui da lis nâfs... i fulmins globulârs... misteri!)*